

金石續編

金石續編卷第十

武進陸耀通纂

太倉陸增祥校訂

唐七

尼韋契義墓志

石縱橫各一尺八寸二十五行行二十四字正書在陝西咸陽縣

唐故龍花寺內外臨壇大德韋和尚墓誌銘

并叙

從父弟鄉貢進士同刻撰

大德姓韋氏法号契義京地杜陵人也元和戊戌歲四月庚辰恬然化滅報年六十六僧夏四十五粵以七月乙酉遷神於萬年縣洪固鄉之畢原遺命不墳不塔積土為壇植尊勝幢其前亦浮圖教也曾王父諱安石

皇尚書左僕射中書令大父諱斌

皇中書舍人

臨汝郡太守烈考諱袞

皇司門郎中眉州刺史家

承卿相德勲之盛族為關內士林之冢始

先妣范

陽廬夫人以賢德宜家蕃其子姓故同氣八人而行居

其次在女列則長焉自始孩蘊靜端介潔之性及成人

鄙鈇華靡廉之飾密冥心於清淨教親戚制奪其持愈

堅年十九得請而剃落焉大厯六年

制隸龍花寺

受具戒於照空和尚居然法身本於天性嚴護律度擇

氏高之

國家崇其善教樂於度人勅東西街置大

德十貞登內外壇場俾後學依歸傳諸佛心要既膺是

選其道益光門人宗師信士嚮仰如水走下匪我求蒙

持一心之修繕佛宇來四輩之施捨金幣高閣山聳長
廊鳥跂象設既固律儀甚嚴率徒宣經與衆均福故聞
者敬而觀者信如來之教知所慕焉嘗從容鄉里指於
北原而告其諸弟曰此吾之所息也為其識之嗚呼生
歸於佛歿歸於鄉至哉其孝乎所以報生育劬勞之恩
脩矣窳窳之制咸所遵承弟子比丘尼如壹等服勤有
年黽奉遺教杖而會葬者數百千人極釋氏之哀榮難
乎如此迺沈礎而志于墓云

迷方之人妄聚之身白月下臨苦海無津我得度門性
□□□亦既落髮於焉報親孝乎終始歸于故里
召幢□□□□南趾

尼契義歿後門弟子為作經幢見前錄此誌云杖而
會葬者數百千人唐世倭佛成風往往如此故警空
和尚塔志云弟子與俗侶白衣會葬服縗者千人焉
元裝法師塔誌云葬於滌東京畿五百里內送者百
萬餘人淨業法師塔誌云葬之日道俗闐湊號惋盈
衢不可制止者億百千矣噫送而縗焉猶可也至杖
而會葬必無之事也彼操筆為文者極言弔客之衆
多不計杖制之輕重其荒謬乃至如此鈞清節
金石記
右墓志二十五行行二十四字正書字徑四五分此
志首標大德韋和尚文又云僧夏四十五而中言其
行居次在女列則長後又云弟子比邱尼如壹等則

明是女尼而亦稱僧與和尚也與孟法師碑稱女道士為法師同意志敘其曾祖安石尚書左僕射中書令祖斌中書舍人臨汝郡太守父表司門郎中眉州刺史以唐書宰相世系表攷之安石乃韋氏勛公房之後歷相武后及中宗睿宗斌乃安石第三子而表誤臨汝郡太守為臨安太守斌子表下不言其為司門郎中眉州刺史而云駕部員外郎南監本明補皆又誤駕為馬皆當以墓志正之又言表有三子其弟逢之子同翊字啟之即此撰志文之從父弟同翊也志言先妣盧夫人以賢德宜家蕃其子姓其所稱先妣蓋即韋和尚之母也

之母也

古泉山館金石文編

按契義韋氏女為尼者其從祖弟同元撰經幢記
稱比邱尼大德諱契義俗姓韋氏此誌則從父弟
同翊撰題云韋和尚墓志銘所罕見也曾王父安
石大父斌考袞並見唐書安石斌俱有傳宰相世
系表斌臨安大守袞駕部員外郎同翊斌孫逢之
子字啟之並與誌合臨汝作臨安乃表誤刻斌本
傳亦作臨汝元和戊戌憲宗十三年

宮闈令西門珍墓誌銘

石縱橫各二尺二寸三十二行行三十二
字至三十六字不等正書在咸陽縣裴氏

大唐故朝議郎行宮闈令充威遠軍監軍上柱國賜紫
金魚袋西門大夫墓誌銘并序

從姪鄉貢進士元佐上

公諱珍京兆雲陽人也曾祖祖貳並蘊異才不苟榮
祿孝悌雖形於家室聲芳已口於遠近父進朝議郎行
內給事賜緋魚袋立性恭寬執心忠亮入侍閭宸出撫
軍師歷事四朝竟無敗累故中外貴戚咸遵厥行公
器局宏邈見解殊倫幹於理劇果於從政志存大略不
忌小節恒人譏其傲睨高賢許其豁達至德之初釋褐
從仕大厯之末擢居宣徽建中四年王室多故涇原叛
卒晝入犯門鑾輿西巡以避封豕艱虞之際尤尚
通才除內府局丞充鳳翔隴右節度監軍判官時懷光
不臣潛與泚合舉華於是更幸梁洋節使楚林果有

疑貳公每於衙府輒肆直言諭其將士徼以禍福

國家靡汙隴之憂州縣免誅夷之弊微公之力殆不及此

德宗聞而異之俾充荆襄沔鄂洪府

宣慰使

興元元年遂除洪府判官監先鋒兵馬使伊慎下安黃等州貞元元年来

獻俘馘

上旌公功拜內僕令

赴本道其年季秋改充豪壽觀察監軍判官尋除張建封尚書為徐泗節度

詔公獨監送上職名如故其

年朝覲遷荆南監軍

上以公習於戎事欲將任

重聖心未決久而不遣至八年充劔南三川宣

慰使其六月監潯青行營兵馬三千餘人戍于岐山西

扞荒服

上以公臨口不私撫軍有術凡積星歲踰

十瓜時十三年入奏

上嘉其勲錫以朱紱毘戎自

從會盟僭負恩信知我有脩未嘗犯邊

上以閑東

甲士遠從勞役志令罷鎮却歸本管三軍別公援繼揮

泣如訣父母豈勝道哉既歸闕庭復任高品暨

德宗昇遐

順宗嗣位爰選耆德以輔

儲皇轉為

少陽院五品永貞元年屬

今上龍飛公以密近翼

戴之績賜紫金魚袋充會仙院使元和元年改充十王

宅使歷事

六朝公智足以周身謀足以解難事上不

逼接下不侮自束髮委質銜

命撫軍宣慈則蒸庶

再撫討叛則兜渠授戮動有流譽人無謗言若非淑慎

曷能臻此公身居祿位志不驕矜克遵象外之談不諱

生前之事遂於長安縣龍首原西距阿城東建塋域高
崗雖枕夏屋未封君子聞之念曰知命 夫人馬氏驥
之女也內脩四德外諧六如豈睦允蜴於曹風折旋不
虧於戴禮不幸先公而歿有子四人長曰季常次曰季
平季華季輝或名叅 密侍或職列禁軍咸蘊棊堂之
姿俱是保家之主以元佐性無飾偽文好直詞爰命紀
能庶旌實錄其詞曰

洪河孕氣兮嵩岳粹精
才調不羈兮智略縱橫
結髮從宦兮捐私徇公
入侍丹陛兮三接明寵

聖君當馭兮哲人乃生
器宇寢深兮量包滄瀛
弱冠受命兮臨人撫戎
出宣青塞兮九譯潛通

功成位高兮鏘金拖紫

居安慮危兮先人後己

去健羨師老氏之罔言

齊死生宗大仙之至理

自昔有生兮孰能不亡

孝彼靈龜兮兆此龍崗

或培或築兮高墳深穴

爰栽爰植兮青松白楊

上以公恪勤事

主密慎左右至七年遷監威遠軍使

晝巡夜警衛士畏威敷奏

闕庭衆稱其美謂保貞吉

以享百齡逝川不留奄隨朝露以元和十二年七月一

日遘疾終于脩德里之私第春秋七十有四以明年七

月廿日遷窆於長安縣承平鄉先修之塋從其治命也

是誌卒葬年月另敘於銘詞之後前序及銘係珍作

生壙時命從子元佐預為撰刻銘後三行則葬時補

敘也

古誌
石華

右墓志首尾共三十二行正書字徑五分許志言珍京兆雲陽人曾祖名空而不書祖彭父進朝議郎行內給事賜緋魚袋珍至德初釋褐從仕大厯末擢居宣徽後除內府局丞充鳳翔隴右節度監軍判官德宗俾充荆襄沔鄂洪府宣慰使興元元年除洪府判官監先鋒貞元元年拜內僕令改豪壽觀察監軍判官又遷荆南監軍八年充劔南三川宣慰使又監淄青行營十三年歸闕復任高品順宗嗣位選為少陽院五品永貞元年賜金魚袋充會仙院使元和元年改充十王宅使七年充威遠軍使元和十二年卒年

七十四其云建中四年王室多故涇源叛卒晝入犯
門鑾輿西巡以避封豕攷新唐書德宗紀是年十月
涇源節度使姚令言反犯京師帝如奉天志又云鳳
翔隴右節度監軍判官時懷光不臣潛與泚合翠華
於是更幸梁洋節使楚林果有疑貳公每於衙府輒
肆直言諭其將士徼以禍福國家靡汙隴之憂州縣
免誅夷之弊微公之力殆不及此德宗聞而異之俾
充荆襄沔鄂洪府宣慰使興元元年遂除洪府判官
監先鋒攷本紀是時鳳翔節度朱泚亦繼反張鎰代
為節度其後營將李楚琳殺之自稱留後朱泚犯奉
天禁軍敗興元元年二月李懷光為太尉反丁卯帝

如梁州三月壬辰次梁州五月李晟等屢敗朱泚復京師六月姚令言朱泚皆伏誅改梁州為興元府給復二年又給復洋州一年此其事也蓋珍即為張鎰監軍判官正與楚琳同事然張鎰傳言營將李楚琳嘗事朱泚得其心軍司馬齊映等曰楚琳必為亂乃遣屯隴州楚琳知之稽故未行鎰以帝在外心憂惑謂已亟去不為備楚琳夜率其黨作亂齊映自竄出齊抗託傭皆免鎰縋城走不及遠與二子為候騎所執楚琳殺之絕無一言及珍又章臯傳言德宗狩奉天李楚琳殺張鎰劫衆歸朱泚隴州刺史郝通奔降楚琳則楚琳後仍與朱泚為亂珍有何功而志乃云

國家靡汙隴之憂州縣免誅夷之弊微公之力殆不
及此毋乃失之諛矣楚琳作楚林志與史異似當以
志為正洋州本析梁州置境壤相連攷本紀言給復
洋州一年而韋臯傳亦云帝在梁洋還則當時德宗
必曾至洋州本紀既云二月丁卯如梁州不當於三
月壬辰又言次梁州疑梁州之梁乃洋字之譌攷藩
鎮表開元五年置隴右節度又上元元年置興鳳隴
西節度建中四年賜號保義節度後吐蕃陷隴右貞
元初置行秦州以刺史兼隴右經畧使以鳳翔節度
使領隴右支度營田觀察使志作於元和時故有鳳
翔隴右節度之稱本紀又云建中四年九月舒王謨

為荆襄江西沔鄂洪府宣慰使及除洪府判官監先鋒蓋為晉王時開官也地理志洪州豫章郡上都督府蓋晉王之從府於洪州故稱洪府又云兵馬使伊慎下安黃等州貞元元年來獻俘馘攷本紀貞元十五年十一月安黃節度使伊慎敗吳少誠於鍾山十六年七月伊慎及吳少誠戰於申州敗之而其先克復獻俘事遺而未載志又云其年秋改充豪壽觀察監軍判官尋除張建封尚書為徐泗節度詔公獨監送上職名如故者攷張建封傳建封為壽州刺史李希烈僭天子位淮南節度使陳少游陰附之約破壽州以趨江都建封堅壁据之賊不能東遷圍練使帝

還自梁少游憂死進御史大夫濠壽廬觀察使繕墮
治兵希烈使驃帥悍卒來戰建封皆沮歟之賊平進
封階又任一子正員官貞元四年拜御史大夫徐泗
濠節度使則珍為濠壽觀察監軍判官即為張建封
之屬官也前但云濠壽而無廬後但云徐泗而無濠
濠字又作豪皆與史異攷唐書地理志云濠州濠字
初作豪元和三年改從濠此志刻於元和十三年而
猶作豪者蓋西門君於元和元年後既營生壙即屬
王元佐撰刻此志及卒後但續刻卒葬之事而未及
追改豪為濠也廣韻豪下云州名古鍾離國隋改為
州又大厯九年顏魯公干祿字書及韓昌黎集徐泗

濠三州節度掌書記廳石記皆作棗州而通典謂隋改楚州曰濠州因濠水為名唐初因之元和郡縣志亦云武德五年杜伏威附改濠州濠字中間誤去水元和三年又加水吳會能改齋漫錄据杜氏之言駁洪慶善攷正韓集作濠之誤皆非是惟志又云遷荆南監軍未知其詳志又云八年充劍南西川節度使本紀貞元五年九月丙午劍南西川節度使韋臯敗吐蕃於臺登北谷克雋州又攷劍南節度於至德二載分西川東川是時西川而志作三川恐三乃西之誤岐山為鳳翔府屬縣縣有岐山乃京畿近地珍所厯之官以百官志攷之內侍省有六局一曰內府局

有令二人丞二人掌中寶藏貨賄給納之數及供燈燭湯沐張設凡朝會五品以上及有功將士蕃酋辭還皆賜於庭一曰內僕局亦有令丞各二人掌中官車乘皇后出則令居左丞居右夾引又內侍省有高品一千六百九十六人品官白身二千九百三十一人又宮闈局亦內侍省六局之一有令丞各二人掌侍宮闈出入管籥又內給事十人掌承旨勞問分判省事凡元日冬至百官賀皇后則出入宣傳等然則珍係內侍省之宦官其父之官為內給事亦係內侍之流矣少陽院會仙院皆不見於百官志而云順宗嗣位爰選耆德以輔儲皇轉為少陽五品則知其為

東宮之官也十王宅者據長安志云改元先天之後皇子幼則居內東封後以年漸成長乃於安國寺東附苑城同為大宅分院之名為十王宅令中官押之於夾城中起居每日家令進膳十王謂慶忠棣鄂榮光儀穎永濟也志言內常侍正五品下內給事從五品下而太子有內方局令二人亦從五品下此云少陽院五品者蓋東宮官之大者也惟其初官云擢居宣徽考宋時有宣徽南院使北院使掌總領內諸司及三班內侍之籍而於唐志未見豈史之漏乎節度使有判官一人而所謂監軍宣慰使者屢見本紀及列傳亦不載於百官志蓋皆行軍時差遣權置之名

無定職也。据志珍乃於生前建塋域，猶後人所云生
墳也。而文銘詞後續題其遷監威遠軍使及卒葬年
月，則此志實作於建域之時，并即於其時先為勒石
者，故其首行官銜有磨改迹，蓋以充威遠軍監軍六
字，添入文後有子四人，四係三字，磨改而其名季華
季煜四字亦有磨改跡，蓋少子亦係刻文後所生，故
以其名補入耳。惟此文題鄉貢進士王元佐上，並非
珍之同姓，而稱從姪，為他刻所未見，不可解也。威遠
軍亦不見於藩鎮表，俟再攷之。此墓志前輩皆未見，
恐係近來出土，亦關中之物。文云龍首原西距阿城
東建營城攷長安志，秦阿房宮一名阿城，在長安縣

西二十里後又云遷之於長安縣承平鄉先修之塋
長安志無承平鄉其所稱修德里蓋即修德坊也長
安志言在朱雀街之第三街即皇城西之第一街第
一坊也

古泉山館
金石文編

按唐中官西門珍誌石嘉慶二十五年出土為咸
寧帖賈裴修甫所得考誌序建塋紀石皆在生時
而記卒葬於銘後元佐銘詞不書撰而書上皆創
見也西門受氏始於春秋元和姓纂鄭大夫居西
門因氏焉列子有西門子魏文侯時西門豹為鄴
令漢王莽時有道士西門思洞仙傳有西門惠按
漢書王莽傳道士西門君惠無名思者惟唐宦官

有西門思恭珍蓋其族也唐雲陽縣為今涇陽
化地括地志雲陽城在雍州雲陽縣西八十里元
和郡縣志故城在雲陽縣西北八十里長安志本
漢縣昭帝置屬左馮翊古有雲陽宮因以為名唐
武德元年析雲陽縣置石門縣貞觀元年改石門
縣為雲陽縣改雲陽縣為池陽縣屬雍州省雲陽
以其地入池陽而改曰雲陽天授二年以雲陽置
鼎州領雲陽三原涇陽醴泉四縣大足元年州廢
縣隸京兆府西南至府一百二十里以今地考之
當在涇陽道化境也充十王宅使者唐制自先天
以來皇子幼居內長居十王宅以中官押之珍釋

揭於至德之初終於元和之末事肅宗代宗德宗
順宗憲宗凡五主而云厯事六朝者以生於天寶
五年當元宗之世計珍始入禁近纔十數齡耳朱
泚李懷光李楚林之叛伊慎之下安黃張建封之
鎮徐泗並與正史合惟楚林唐書作楚琳小異陸
公集亦阿城即阿房宮故址長安志漢書云阿城
作楚琳秦阿房宮也以其牆壁崇廣俗呼為阿城唐張賁
然撰忠武將軍茹義忠神道碑葬於長安縣永平
鄉阿房殿之墟此誌以阿城屬承平鄉承永字近
則承平鄉之阿城即永平鄉之阿房殿也今長安
縣西二十里王寺厰有村名東阿房官西阿房官

蓋即其地脩德里亦見長安志皇城西第一街街西從北第一脩德坊本貞安坊武后改

太子洗馬崔載墓誌

石梁橫一尺三寸二十一行行二十四字至二十八字不等正書在順天府

唐故太子洗馬博陵崔府君墓誌銘并序

承務郎試蜀王府參軍成表敬撰

士有遊藝據德斧藻言行不形喜愠不誤是非者則聞

之于府君焉府君諱載字載其先齊太公之後食

菜于崔而因氏焉洪源茂根世有名士至于貂蟬映時

金紫奕代竹帛繁盛不復書矣王父謙皇易州脩

政府折衝列考季試恒王府司馬府君則司馬之第

二子也伯仲五人皆美鬚鬣嚴容貌各身長六尺二寸俱懷文武之用爵為豪盛之家長曰戩隴州汧陽縣尉令弟拱長武城使兼御史大夫令弟晟文林郎太子通事舍人令弟成大理寺主簿府君植性廉潔執心沖和遷善罔遺見惡必止豈謂德優齡促奄隨尺波享年五十有九以元和十四年五月廿三日遘疾終于幽州薊縣招聖里之私第也夫人彭城劉氏莞莞威容悄悄閨壺齋潔喪事敬逾古昔有子五人男二人女三人長曰公聿試左武衛兵曹參軍侍疾有黃香之譽居喪繼米也之哀次曰公淑善諷詩禮名美戎即昆弟等皆善居喪絕漿茹荼泣血羸瘠隣里哀之也女子等皆以

孩提生知孺慕可哀也哉粵以其年十一月十六日窆
于幽州幽都縣保大鄉杜村北一里之原祔于先塋
禮也表嶺膏接府君之餘論沐府君之清
風學淺詞荒叙事有闕緘之心府有媿幽默銘曰
保大之鄉 乘乾之涓 泉扃長夜 潛翳英姿 逝
于中齡 孰不懷其 崔氏之先 世有英賢 既盛
簪華 亦耀貂蟬 太公之封 千古昭然 孀妻茹
荼 令子泣血 隣無相舂 親有鳴噎 志諸貞石
用旌賢哲

按唐太子洗馬崔載終於幽州薊縣招聖里窆於
幽都縣保大鄉杜村唐書地理志河北道幽州領

縣九荊州所治幽都管郭下西界與荊分理

韋端玄堂誌

石縱橫各一尺六寸二十七行行二十五字正書在陝西咸陽縣

唐故朝散大夫秘書省著作郎致仕京兆韋公玄堂誌
第四子前山南西道節度判官將仕郎試大理司直
兼殿中侍御史紆謹撰并書

唐元和十四年三月廿三日 公棄背于長安新昌

里私第享壽八十有三嗣子縝洎系練紆絢哀踟于天
駸未敢死乃誓先王卜地之義以明年五月一日奉遷

靈座祔于萬年縣洪固鄉畢原 先太夫人太

原王氏之塋焉縝等咸以 公潛耀道德不求顯著他

人論譏未能盡美盍自志之 公諱端字正禮 五代
祖孝寬後周大司空卽襄公 高祖津隋臣部尚書
曾祖琬皇成州刺史贈禮部尚書 祖季弼太僕寺主
簿 烈孝廉尚書庫部郎中自 卽襄公以盛業洪伐
延耀後嗣以至于 郎中茂續其德口官壽不至士大
夫到于今嗟稱之 公卽 郎中第二子也體苞元精
天付全德孝友忠信莫匪生知以古之賢達有保身遺
名不降其志不辱其身之道莫不洞與心契歸於一揆
故常以恬曠自適怡攝為宗是以家人忘貧位不稱德
官歷率更寺主簿下邳縣主簿下邳陽翟二縣丞國子
監主簿凡五仕三為色養二為孤幼皆非 公之志也

自是之後蕭然杜門淮夷削平之明年

皇帝在宥天下方宏孝理詔百辟父母存有顯擢歿

有褒贈時縝為工部郎中由是拜公朝散大夫秘書

省著作郎致仕先太夫人追贈臨汾縣太君時謂

公之義方縝之顯揚斯為至矣太夫人曾祖諱

子真皇義州錄事參軍祖怡河南尹東都留守考毗

昭應縣尉太夫人生令族德門稟柔明淵懿循睦

婦道裁成母訓輔佐君子踰廿年所以敬養先姑

無違尤慈幼惠下無怨悔縝等不孝祿養未及禍罰

已鍾而外族淪替靡所依倚是以霜露怵惕有加罔極

之痛焉以貞元六年奉安宅北至是蓋拊嗚呼蒼天縝

工部郎中系陽翟縣尉練鄉貢進士紆兼殿中侍御史
絢前太廟齋郎紆頑闇不類哀敬不文泣血書石以
真泉隧

右唐韋端固堂志首尾共二十七行每行二十五字
首二行擠而不勻正書字徑五分許文為端之子紆
撰書其敘五代祖孝寬後周大司空鄭襄公高祖津
隋民部尚書曾祖琬皇成州刺史贈禮部尚書祖季
弼太僕寺主簿考廉尚書庫部郎中端為廉之第二
子以新唐書宰相世系表攷之韋氏鄭公房叔裕字
孝寬隋尚書令鄭襄公生六子陵州刺史壽光縣男
津為叔裕第五子津第二子成州刺史琬琬第六子

季弼季弼子靡考功員外郎端為靡之第二子端生
二子鎮紆表載津廉官階皆與志不合自當以志為
正表又誤廉之名為靡而以尚書庫部郎中為考功
員外郎并闕端之官又端有五子止載鎮紆而遺系
練絢且据志言鎮工部郎中系陽翟縣尉練鄉貢進
士紆兼殿中侍御史絢前太廟齋郎而表皆無之孝
寬周書及北史皆有傳傳言韋叔裕字孝寬京兆杜
陵人少以字行以戰功厯官尚書右僕射拜大司空
天和五年進爵鄖國公周宣帝崩隋文帝輔政發關
中兵以孝寬為元帥東伐關東悉平凱還京師薨年
七十二贈十二州諸軍事雍州牧諡曰襄有六子總

壽齋津知名据傳所言則孝寬之為尚書令卽襄公
皆當在後周時與志所言合表屬之隋失其實矣此
志不稱墓而稱_因堂為自來墓志所未見_因化閣帖
唐高宗敕亦有使至知_因堂已成之語想當時稱墓
為_因堂猶滕公墓石之言佳城也或因其子所作不
忍言墓故改稱為_因堂耳志後言以貞元六年奉安
宅兆至是蓋祔貞元六年在元和十五年前三十年
乃謂葬其母王氏之年也志云淮夷削平之明年皇
帝在宥天下方宏孝理詔百辟父母存有顯擢歿有
褒贈時_續為工部郎中由是拜公朝散大夫秘書省
著作郎致仕以史攷之當是元和十二年十一月吳

元濟伏誅之後也唐時恩例以子官而父存者雖已去官尚得遷轉超擢仍聽其致仕似較後代僅得以子之官封贈者為更優志文簡質無華書法亦秀雅前人未見著錄當亦近年出土者長安志載洪固鄉在萬年縣南一十五里管邨四十八

古泉山館金石文編

按韋端玄堂誌第四子紆撰書端五仕不出丞簿而題稱朝散大夫秘書省著作郎致仕者元和十三年淮西既平有詔推恩百官父母故端得拜顯揚之典端先世著於唐書宰相世系表鄭公房與誌畧同元和姓纂鄭國公裕字孝寬周大司徒尚書令生津隋隴州刺史黃門侍郎吏部尚書唐諫

議大夫太僕少卿壽光男津生琬職方員外成州
刺史琬生季弼季弼生廉考功員外廉生端端生
縝紆與誌互異据誌元和十四年己亥端壽八十
有三則生於開元二十五年丁丑卒之明年葬萬
年縣洪固鄉畢原夫人王氏之塋以子縝所撰夫
人王氏墓志合之大厠十三年戊午夫人年三十
九則生於開元二十七年己卯十七于歸當天寶
十四載乙未凡二十四年而歿故曰輔佐君子踰
廿年也越十二年為貞元六年庚午葬祔於姑又
越三十年而端與夫人同穴蓋端長於夫人二年
後夫人四十二年而卒夫人志稱曾祖真行有唐

汝州藥縣令父毗京兆府奉天縣丞此志則稱夫
人曾祖諱子真皇襄州錄事參軍考毗昭應縣尉
惟祖怡官爵二誌皆同又夫人誌子五人曰縝曰
潔曰系曰綰曰緝端誌子縝系練紆綯亦五人縝
系見前誌餘名不同意端嘗有子八人迨元和庚
子誌墓之時僅存其五或潔為前卒而綰緝更名
皆未審也此可補唐書宰相世系之闕林寶姓纂
撰於元和七年則在此誌之前矣唐時子撰父碑
者始於令狐德棻之撰令狐熙碑子書父碑者始
於于立政之書于志闕碑其以墓誌為志堂誌則
此為創見志堂墓宅也閣帖唐高宗書云使至知

園堂已成既得早了深以為慰陵初料高一百一
十尺今聞高一百三十尺不知此事虛實是以陵
寢為園堂蓋唐時園堂之稱貴賤同之

南海廣利王廟碑

碑高七尺五寸廣三尺六寸二十四行行五十字正
書額高一尺四寸廣二尺五寸題南嶺神廣利王廟
碑八字篆書在廣東廣州府南海廟

南海神廣利王廟碑

使持節袁州諸軍事守袁州刺史韓愈撰

使持節循州諸軍事守循州刺史陳諫書并篆額

海於天地間為物最鉅自三代聖王莫不記事於傳
記而南海神次最貴在北東西三神河伯之上號為祝

融天寶中

天子以為古爵莫貴於公侯故海岳之祀犧幣之數放而依之所以致崇極於大神今王亦爵也而禮海嶽尚循公侯之事虛王儀而不用非致崇極之意也由是冊尊南海神為廣利王祝禱祭式與次俱昇因其故廟易而新之在今廣州治之東南海道八十里扶胥之口黃木之灣常以立夏氣至命廣州刺史行事祠下事訖驛聞而判史常節度五嶺諸軍仍觀察其郡邑於南方事無所不統地大以遠故常選用重人既貴而富且不習海事又當祀時海常多大風將往皆憂戚既進觀顧怖悸故常以疾為解而委事於其副其來已久故

明宮齋廬上雨旁風無所蓋鄣牲酒瘠酸取具臨時水陸之品狼籍邊豆薦裸興俯不中儀式吏滋不供神不顧享盲風怪雨發作無節人蒙其害元和十二年始

詔用前尚書右丞國子祭酒魯國孔公為廣州

刺史兼御史大夫以殿南服公正直方嚴中心樂易桓慎所職治人以明事神以誠內外單盡不為表襮至州之明年將夏祝冊自京師至吏以時告公齋被視冊指羣有司曰冊有

皇帝名乃

上所自署其文曰

嗣天子某謹遣官某敬祭其恭且嚴如是敢有不承明日吾將宿廟下以供晨事明日吏以風雨白不聽於是

州府文武吏士凡百數交謁更諫皆揖而退公遂陞舟
風雨少弛櫂夫奏功雲陰解皎日光穿漏波伏不興省
牲之夕載陽載陰將事之夜天地開除月星明櫜五鼓
既作牽牛正中 公乃盛服執笏以入即事文武賓屬
俯首聽位各執其職牲肥酒香罇爵靜潔降登有數神
具醉飽海之百靈祕恠慌惚畢出蜿蜿蛇蛇來享飲食
闔廟旋艦祥飆送颿旗纛旄麾飛揚晻藹鐃鼓嘲轟高
管噉譟武夫奮掉工師唱和穹龜長魚踴躍後先軋端
坤倪軒豁呈露祝之之歲風災熄滅人厭魚蟹五穀旨
熟明年祀歸又廣廟宮而大之治其廷壇改作東西兩
序齋庖之房百用具脩明年其時公又固往不懈益虔

歲仍大和蠶艾謠詠始公之至盡除他名之稅罷衣食
於官之可去者四方之使不以資交以身為帥燕享有
時賞與以節公藏私蓄上下與足於是免屬州負逋之
緡錢廿有四萬米三萬二千斛賦金之州耗金一歲八
百困不能償皆以丐之加西南守長之俸誅其尤無良
不聽令者由是皆自重慎法人士之落南不能歸者與
流徙之胄百廿八族用其才良而廩其無告者其女子
可嫁與之錢財令無失時刑德並流方地數千里不識
盜賊山行海宿不擇處所事神治人其可謂備至耳矣
咸願刻廟石以著厥美而繫以詩乃作詩曰
南海陰墟祝融之宅即祀于旁

帝命南伯

吏脩不躬正自今公明用享錫右

我家邦惟

明天子惟慎厥使我公在官神人致喜海嶺之陬既足
既濡胡不均弘俾執事樞公行勿遲公無還歸匪我私
公神人具依

元和十五年十月一日建

口字人李耐齊

按南海神廟碑王氏萃編就殘缺裒本錄入以集
本足之不詳碑式行字道光六年廣東巡撫伊爾
根覺羅公成格親祀祠下得拓全碑并碑陰及兩
側題記以贈因補錄如右碑中天子皇帝明天子
皆平出與六典台上所自署之上帝命南作之帝
皆空五字事訖驛聞之聞及詔用我邦家皆空三

字魯國孔公空一字今王亦爵王字接寫萃編謂
集本明宮齋廬之宮碑作言其恭且嚴之其碑作
某今碑正作宮作其與集本無異王氏裝本不清
誤讀耳趙氏金石錄南海神廟以集本校之皆同
惟集本蜿蜿蜒蜒碑為蜿蜒地地以碑為正又新
唐書孔戣免屬州逋負十八萬緡米八萬斛而碑
云緡錢廿有四萬米三萬二千斛與傳不合要亦
以碑為正也餘詳萃編

韓退之書白鸚鵡賦

石高二尺二寸廣三寸許四十八行行四五六字不
等草書後翁方綱釋文正書在廣東潮州府韓文公
廟

白鸚鵡賦

若夫名依西域族今南海同朱喙之清音變綠衣於素
采唯茲鳥之可貴諒其嫩之斯在爾其入玩於人見珍
奇質狎蘭房之妖女去桂林之雲日易喬枝以羅袖代
危巢以瓊室慕侶方遠依人永畢託言語而雖通顧形
影而非匹經過珠鈿出入金鋪單鳴無應隻影長孤偶
白鵬於池側對皓鶴於庭隅愁混色而難辨願知名而
自呼明心有識懷思無極芳樹絕想雕梁撫翼時嘆花
而不言每投人而方息慧性孤寡雅容非飾含火德之
明輝被金方之正色至如海燕呈瑞有玉筐之可依山
雞學舞向寶鏡而知歸皆羽毛之偉麗奉日月之光輝

豈憐茲鳥地遠形微色淩紈質彩奪繒衣深籠久閑喬
木長違儻見惜其羽翼與遷鶯而共飛 退之

按王維白鸚鵡賦見唐文粹文苑英華此草書字
徑四五寸末行有退之二字相傳謂韓昌黎刺潮
州時所書雍正十二年渝州龍為霖知潮州事摹
勒於韓祠東壁乾隆三十六年大興翁方綱附刻
釋文茲從釋文錄入以文粹英華本校之其不同
者如族今南海文粹英華並作族本南海唯茲鳥
之可貴英華作茲禽易喬枝以羅袖代危巢以瑣
室兩以字英華俱作於顧形影而非匹文粹而作
之願知名而自呼英華願作每懷思無極英華作

何極有玉筐之可依文粹作玉筐英華作玉筍寶
鏡英華作瑤鏡羽毛英華作毛羽與遷鶯而共飛
英華作於飛皆以是刻為正

司馬宗夫人孫氏墓誌

石縱橫各一尺三寸十九行行
十九字正書在陝西長安縣

唐朝議郎行鳳州司倉參軍上柱國司馬君夫人新安
孫氏墓誌銘 并序

前翼王府參軍賈中立撰

夫人字堅靜建業人也 曾王父瑜睦司馬即吳之洪
胤矣祖從朗錄事父愿皇尉望江咸襲繁祉垂裕後昆
夫人婉婉令淑挺然生知及笄年適于司馬司倉宗

窈窕閑雅謙和優柔行合規矩言堪典模恭理黍稷調
暢琴瑟義光中饋孝顯家風絢衣無華舉案有則訓女
四德示男六經親族娣姒肅然心伏凡在閨閭莫不書
紳性止恬淡情忌嗜慾洞了生滅俄而謝世元和十五
年五月十六日微疾而瘵終于長安頌政里甲第也享
年五十三以其年十一月廿二日將遷於國西阿城南
原礼也嗚呼生事畢矣二女早逝有子長裕泣血哀號
抑情就礼痛雍穆之風泯然斯絕刊石紀德庶幾不朽
中立舊館之賓睹其家道不揆為銘未克名實銘曰
婉婉積善 不享遐齡 貞操符礼 柔和合經
尺波一謝 寸晷同停 愛其芳烈 刻石存銘

右墓志文共十九行行十九字正書極秀媚字徑五六分攷長安志頒政坊在皇城之西即墓志所云頒政甲第也又史記正義引括地志及元和郡縣志云阿城在長安縣西北十四里長安志云秦阿房宮一曰阿城在縣西二十里據此云將遷于國西阿城南原則長安志是也

古泉山館金石文編

按司馬宗夫人孫氏墓誌銘龔中立撰宗與中立史皆未著孫氏託始東吳先世亦無可攷元和郡縣志睦州江南道浙西觀察使管望江縣淮南道揚州之屬夫人終於長安頒政里長安志圖唐京城朱雀街西第三街即皇城西第一街當安福門

外為頒政坊遷於國西阿城南原阿城乃秦阿房
遺址漢書東方朔傳今長安縣西北王寺村有名
東阿房宮西阿房宮者即此阿城之地宋游師雄
謂慕容冲因殿基築城民間目為阿城豈未讀漢
書耶考詳元祐八年游師雄阿房宮賦後序石刻

七星巖李紳題名

摩崖高二尺廣尺四寸五行李紳二字為一行其
四行行七八字不等正書左行在廣東高要縣

李紳

長慶四年二月自戶部侍郎貶官至此寶曆元年二月
十四日將家累遊

郭功父石室遊篇云攷二李之勁筆謂北海石室記

及此刻也唐書本傳敬宗立李逢吉乘間言紳不利於陛下請逐之帝初即位不能辨乃貶紳為端州司馬敬宗以長慶四年正月即位二月辛巳始聽政紳貶官正在此時其明年改元寶曆矣

潛研堂金石跋尾

王化清石室記

摩崖高三尺五寸廣四尺記十三行行十七字至二十二字不等正書左行在廣東高要縣七星巖

遊石室新記

高要郡北十五里有石室詭恠萬狀崆峒其中發揮靈蹤盤礴厚地皆神仙之窟宅為區輿之勝槩或有巨石皆似蹲鯢反顧疊花仰空的巖環峭色如截肪矣旁引危竅疑為洞門橫聳石床方次仙座西廂峭壁之下有

沔泉泚澄鏡色味輕瑤漿東西倚山之陽二十餘里西
通于上武林東拒于零羊峽時開元十五年正月二十
五日右遷陳州刺史北海李邕述石室記列于苔壁懿
平寶曆元年秋九月二十日攝經略巡官試大理評事
權知軍州務賜緋魚袋博陵崔公領寮屬及將吏遊于
茲室探討奇跡異乎幽眈盡日躋攀不盡高意化清時
官守司馬得倍盛遊輒叙鄙詞紀于前事

攝經略巡官朝議郎試大理評事知軍州事賜緋魚
袋崔獻直 文林郎守司馬王化清 守錄事參軍
楊全質 守司倉參軍陳係 守司戶參軍李參
守高要縣令張仲修 守主簿陳行敏 攝尉李□

押衙知衙事褚曾 口衙溫靖

按遊石室新記王化清撰曰新記者因前有李北海端州石室記故題新記以別之不著書者姓名或即化清自書也廣東通志金石略云與李紳題名筆蹟相類疑即紳書又云寶曆元年四月量移紳江州長史豈端州僻在嶺海紳遊石室書記時赦文尚未至耶子攷唐書李紳本傳長慶四年正月敬宗即位因李逢吉間言貶紳端州司馬踰年改元寶曆夏四月上尊號赦左降官與量移紳為江州長史

本傳作刺史
議今據通鑑

遊石室新記作於九月時

紳已去端州化清之守司馬即代紳也記後書名

自經略巡官下至押衙等凡十一人

褚曾溫靖紳通志失載

果九月復遊石室且為書記無不署名之理其非紳書無疑得陪盛遊陪作倍借字唐端州高要郡屬嶺南道理高要縣元和郡縣志本秦南海郡地漢武置蒼梧郡則為蒼梧郡之高要縣梁大同中于此立高要郡隋開皇十一年置端州大業三年罷為信安郡唐武德五年重置端州州當西江入廣州之要口西江即鬱水也太平寰宇記天寶元年改高要郡乾元元年復為端州餘與元和志畧同惟以高要郡為陳時始置則誤此記石刻首稱高要郡郡字甚顯新志訛作高要縣亦失校也

李渤南溪詩刻

裝本高廣行字不計八分書字徑一
寸八分在廣西桂林府南溪元巖

南溪詩序

成紀縣子李渤

桂水過離山右匯陽江又里餘得南溪口溪左屏列崖
巘關麗爭高其孕翠曳煙邐迤如畫右連幽墅園田難
大疑非人間派流數百步至元巖巖下有汚壤沮洳因
導為新泉山有二洞九室西南曰白龍洞橫透巽維蛻
骨如玉西北曰元巖洞曲通坎嶠晴眺離水元巖之上
曰丹室白龍之右曰夕室巽維北梯峻至仙窟仙窟北
又有石室參差呀豁延景宿雲其洞空竝乳溜凝化詭
勢奇狀仰而察之如傘如輦如樂櫃支撐如蓮萼藻井

左睨右瞰似簾似幃似松偃竹襲似海蕩雲驚其玉池
元井嵐窻懸戶迴還交錯迷不可從夕室梁溪嚮郭
四里而近去松衢二百步而遙余獲之自賀芒獲荆璆
與蛇珠焉亦疑夫大舜遊此而忘歸矣遂命發潛敞深
澄危宅勝既翼之以亭榭又韻之以松竹似譙方丈如
昇瑤臺麗如也暢如也以溪在郡南因目爲南溪兼賦
詩十韻以志之寶曆二年三月七日叙全唐詩作寶曆三年
元巖麗南溪新泉發幽色巖泉孕靈秀雲煙粉崖壁糾
峯信天插竒洞固神劈窈窕去未窮還迴勢難極玉池
似無水元井昏不測仙戶掩復開乳膏凝復滴丹爐有
遺趾石迹無留跡南眺蒼梧雲北望洞庭客蕭條風煙

外爽朗形神宛若值浮邱翁從此謝塵役

李渤字滄之當為桂州刺史充桂管都防禦觀察使新舊唐書皆有傳

李涉元巖銘

裝本高廣行字不計八分書字僅寸八分在廣西桂林府南溪元巖

南溪元巖銘并序 青溪子李涉

桂為郡也巖其先之有井室人民百千祀矣居是邦者匪哲則豪何四三里之內而巖不載於前籍為巖將屈於古而合伸於今哉為人未知其巖巖俟人以時哉青溪子昧而未詳也予之仲曰渤受天雅性生不雜玩少時讀高士傳列仙經遊衡霍幽遐之境巢窟廬水石之

與凡俗所覩必皆礪磨大璞翦鑿遺病意適而制非主
於名寶厠初自給事中出藩於桂一之年治鄉野之病
二之載搜郭郭之遺得隱山元巖冥契素尚余因謫去
爰海途由桂林巖之勝再遂其賞勒銘洞口表遠跡於
他年銘曰

桂之有山潛靈億年拔地騰霄戟列刀攢巖之有洞窈
窕鬱盤虎挂龍懸形狀萬端威馳杳冥仰杳嶭玩玉落
磬墜幽聲晝寒巴陵地道小有洞天文籍之間吾何有
焉酒一卮兮琴一曲嶮巖之下可以窮年

唐詩紀事李涉渤之兄纖人也早從陳許辟憲宗
時為太子通事舍人投匭言吐突承璀冤狀孔戣

表其奸逐為峽州司倉參軍大和中為太學博士
復流康州自號青溪子廣西金石畧云涉有奉和
九弟渤見寄絕句知渤行次第九序云予之仲曰
渤仲為弟之通稱不定居次劉玉麐謂渤為仲弟
新書不得稱涉為仲兄非也又敬宗紀寶曆元年
正月七日改元大赦壬申以給事中李渤為桂州
刺史舊史稱渤寶曆中轉給事中誠誤至涉來桂
林當在大和間謫康州時涉有謫謫康州先寄弟
渤言其將至桂也此序亦云謫去炎海途由桂林
康州今肇慶府故曰炎海且必取道桂林玉麐謂
是謫武陵時事亦非其以夷陵為武陵又踵唐詩

遺響之誤

坐忘論

大和三年七月道士張固明書

兵曹鄭準墓誌銘

石高一尺三寸五分廣一尺三寸二十行行二十字正書

故右內率府兵曹鄭君墓誌銘

并序

潁川陳齊之撰

昔鄭桓公為王卿士始受鄭於周因封命氏漢魏以降其族滋大有唐以來口華口軌君其裔也曾王父璿河南少尹王父溥尚書右部郎中厯青瑯相衛充幽懷七州刺史入為左庶子皇考華駕部郎中吉州刺史仕濟

其美時与其能君即吉州之少子也隱不違止顯而成
晦於所與以義於所入以口以遨遊江湖而無所為累
也君諱準字口道其先滎陽人有憲也之貧無口口之
貴人之於此皆不堪其憂君之於此未嘗滑其口口口
口為知命也大和四年正月二日遘疾終于蘇州華亭
縣白砂鄉徐浦塲之官舍享年六十有三有子五人嗣
曰宗儒次曰宗輿次曰宗慶次曰宗遜皆銜恤茹哀克
奉先訓又一子奉釋氏教端嚴清淨修無生忍名曰匪
直嗟乎伯仲并季於執喪之禮皆得順變即以其年秋
八月廿五日權塋于義興縣洞庭鄉震澤里下朱村原
從宜也有女三人皆在冲幼五子以余有往年之舊請

余於文銘曰其生也天其死也天死生皆天兮何適非然嗚呼苟不達於此哀何勝焉

是誌陶氏載入古刻叢鈔其石見存鄭準滎陽人為蘇州兵曹參軍卒於華亭官舍權葬於義興縣之震澤里唐義興今宜興縣也誌末請余於文於當作為或作請文於余亦可唐書宰相世系表鄭璿官河南少尹溥官左庶子華官太常博士華官雖與誌異其為準之三代無疑然表載溥華父子在璿右一行不系於本行之下以誌證之知其誤矣

古誌
石華

按準曾王父璿王父溥父華並見宰相世系表璿河南少尹溥左庶子與此誌合惟華官為太常博士

士溥弟平乃吉州長史以誌證之疑表互錯尚書
右部郎中百官志尚書省尚書令一人左右丞各
一人吏部戶部禮部左丞總焉兵部刑部工部右
丞總焉郎中各一人從五品掌右丞所總之部故
曰右部郎中自華以下世系無考別有準官楊子
丞著房不同難以牽合又唐末詩人鄭準字不欺
乾[匱]進士荆南節度成汭推官為汭所害有渚宮
集一卷則唐固有三鄭準矣右內率府兵曹東宮
官屬六典太子左右內率府其屬兵曹參軍事正
九品下掌文武官及千牛備身之簿書及其勛階
考課假使祿俸之事準為右內率府兵曹而疾終

於華亭徐浦塲官舍唐制關津令尉亦有他官奉
勅監者準豈嘗為徐浦塲津令耶或遊於華亭而
終於監津之舍耶地理志蘇州吳郡華亭縣常州
晉陵郡義興縣並江南道因近權葬幸以片石流
傳至今猶知鄭準誌銘為潁川陳齊之撰書者不
著筆法整秀似為趙孟頫先導矣拓本得之蘇州
未知石藏何處明陶宗儀古刻叢鈔已載之今拓
本華堯真三字缺據叢鈔增入

銘內死生皆天兮原本作真黃氏據古刻叢鈔
作天謫審拓本似是壽字姑錄作天而識之古
刻叢鈔世無善本兩家所見各異也至古誌石

華所載有憲也之貧憲作回為知命也知作之

其年秋脫一秋字何適非然適作爾皆誤

陸增祥志

習空和上塔銘

高一尺四寸廣二尺一寸三十一行行二十一字正書在陝西咸陽縣杜城關帝廟

唐故內供奉翻經義解誨律論法師習空和上塔銘

并序

正議大夫守秘書監上柱國瑯琊縣開國公食邑一千五百戶賜紫金魚袋王申伯撰

天地之德至大非風雷日月之用不能贊其化育而發生乎萬物釋氏之教至精非聰達惠覺之士不能揚其妙道而化度乎群疑天生法師克契斯義用安一世以

垂化後云法師諱習空姓任氏弱而神清幼而不群年
八歲心已嚮佛誠請既行緣愛自去遂授經于惠雲卒
學景鸞耳所一聞亦既懸解目所一覽又若夙習跪陳
精奧師皆歎異知□其法非天縱之孰能如斯法師常
謂弟子曰我靜觀衆生或轉或輾嗷嗷嗤嗤溺於狂妄
若智者不能扶仁者不之慈雖獨揭厲于清源則大聖
之教又將安施於是張善惡報應驅僻邪於中正導真
如之理解拘縛之勞登高抗音化所不化侍
代宗則聲仁王之文言發而歸于大中理貫而合於至
正故君聞而仁臣聞而忠推而廣之夙化斯變
詔法師与天竺三藏譯六波羅蜜經功畢

上獻

天子感歎錫賴有加雖異方之奉斯學者知有所本矣
由是大教揚溢于海內惠風漸漬于人心 朝廷垂

衣刑措于下其或有助乎嗚呼時將不幸人其無依以
貞元十年正月十五日告行于興唐寺報年六十一弟
子惠見等与俗侶白衣會葬服縗者千人口以其年三
月四日弟子智誠等共起 塔于畢原高崗既相与號
慕不逮曰謫鄙人刊銘于石述其妙道用慰永懷銘曰
佛有妙法使皆清淨世界罕聞色塵皆盛 其心逐于妄
情乱于性扇為頽風蕩然莫止 其大哉 我師降厥
慈悲開示寂樂破摧昏疑 其法相既圓色空自離千萬
大衆歎泣而隨 其大教既揚威德亦光除彼煩 其化為

清涼

其五

功成身去自契自蔽銘于塔石与天俱極

大和七年歲在癸丑八月十五日比匠智亮等建

從一

法源

超秀

惟月

惟安

惟永

智謙

日榮

海印

惟曉

惟旭

自謙

善惠

少游

京地田復書

按習空和上塔銘王申伯撰田復書申伯結銜正
議大夫正四品上文散官秘書監從三品職事官
上柱國正二品勳官瑯琊縣開國公從二品爵唐
書宰相世系表瑯琊王氏有申伯不著官爵可據
此補之習空之習同辨玉篇俗辯字興唐寺本名
罔極寺唐神龍元年太平公主為則天皇后建開

元二十六年改名興唐見通鑑注及本寺碑記

司兵參軍杜行方墓誌銘

石縱橫各二尺一寸五分二十四行
行二十四字正書在陝西咸寧縣

唐故同州司兵參軍上柱國京兆杜府君墓誌銘并序

姨弟尚書吏部侍郎鄭澣撰

嗚呼士君子表於代而列於薦紳靡問言由已之仁義
是而又繕性於和體道於仁遵坦衢泳天爵獨稟貞
厚與令名相終始雖位壽或舛人且許之為達矣

公諱行方字友直京兆杜陵人也

曾祖諱元

志杭州刺史

王父諱參謨陝州司倉贈禮部郎

中

烈考諱倫文術政事為時龜主異時選部第

書判

明廷策賢良皆登甲科價賤公論歷憲閭郡

署而後出分符竹

公即豐州府君之長子弱冠

進國庠以經明擢第釋褐任右司禦率府胄曹參軍久之從調換同州澄城縣丞三改秩至左馮翊司兵掾以大和七年秋七月十二日啓手足于上郡昇平里之私第享齡六十問於龜策得十一月甲寅吉乃卜窆于萬年縣龍首鄉龍首原

夫人滎陽鄭氏祔

夫人試秘書省校書郎稱之第二女操順淑朗先

公十年而歿有子五人碩顯顯順其幼小字曰老老女子子二人皆榮立致毀弔賔為之反袂

公平

生於丕義最明四方名人洎中外族昆弟其或旅食靈

臺求選京師懽然授館改星霜無倦色閑探百家之言
賦詩什頗適麗奄□□□人以命不可說相唁澣知
公之事烈詳熱雪涕識□□而□之其銘曰
□□夫□□昭令圖陰陽難詰兮或隆或汙精金不試
兮良玉不沽清風可挹兮白日西徂野雲七兮壘草無
永矣潛寐兮國城東隅

堂弟前同州夏陽縣尉述甫書

宰相世系表襄陽杜氏有元志考功郎中杭州刺史
其子參謨陝州司倉參軍即行方之曾祖及祖也表
載參謨三子冥淪嶠淪水部郎中澧州刺史即行方
之父誤倫為淪行方及其五子之名皆表所未及撰

文之鄭幹乃德宗時宰相餘慶之子大和七年十一月為癸丑朔葬日以甲寅月之二日也估

右志二十四行行二十四字正書字經七八分墓志敘杜公諱行力字友直京兆杜陵人曾祖諱元志杭州刺史王父諱叅謨陝州司倉貽禮部郎中烈考諱倫選部第書判明廷策賢良皆登甲科應憲郎署而後出分符竹公即澧州府君之長子弱冠遊國庠以經明擢第釋褐任右司禦率府胄曹參軍從調換同州澄城縣丞三改秩至左馮翊司兵掾卒有子五人碩顯顯頤老老攷唐書宰相世系表元志考功郎中杭州刺史第七子參謨陝州司倉參軍與志大略

相同惟下列次子淪水部郎中澧州刺史證以此言行力澧州長子及慙憲闢郎署而後出分符竹之語則淪乃倫之誤無疑而倫以下子孫皆缺非此志得傳於世則行力與其了名及官幾湮沒矣且表載杜氏支派有京兆襄陽洹水濮陽四郡之別表以元志等系襄陽杜氏而此稱京兆杜陵人墓志本其子孫譜牒必不謬誤然則表於宗支等尚有舛錯何況他耶唐制取士別科有賢良方正等目隨人主臨時所欲而定名又即謂之制舉所以待非常之才者又選官擇人法有四一曰身者體貌豐偉二曰言者言辭辨正三曰書者楷法遒美四曰判者文理優長四事

皆可取則先德行德均以才才均以勞得者為留不得者為放五品以上不試上其名中書門下六品以下始集而試觀其書判以中選然後奏受凡試判登科謂之入等選未滿試文三篇謂之宏詞試判三條謂之拔萃中者即授官具詳唐書選舉志此文有選部第書判明廷策賢良之語又唐制學生有六皆隸於國子監歲舉取士之科有秀才明經等目而明經之別有五經三經二經一經及三經禮三傳史科等亦詳見選舉志即此文謂行力弱冠入國庠以經明擢第者是也然則行力與其父兩世皆由科第授官者矣文為鄭澣所撰攷澣為宰相鄭餘慶之子見

唐書本傳傳敘其第進士歷官右補闕起居舍人考功員外郎餘慶為僕射避除國子博士史館修撰文宗入翰林為侍講學士賜金紫服尚書左丞出為山南西道節度使以戶部尚書召未拜卒贈尚書右僕射謚曰宣而獨未及此尚書吏部侍郎一官非史有誤即脫漏也而寶刻類編金石錄目載鄭澣開成二年陰符經序柳公權正書載其官河南尹有正書翰林學士院新樓記在京兆乃大和元年十二月又高瑜神道碑在孟州乃大和八年立則澣在當時蓋有書名者又澣自稱為姨弟他碑則未曾見錢塘縣丞殷君夫人碑文內有此稱也攷晉書王廙傳廙丞相

導從弟而元帝姨弟又北史魏收傳父子建性存重
慎不雜交遊唯與尚書盧義僖姨弟涇州刺史盧道
裕相親暱魏書房景遠傳劉郁稱景遠是我姨兄世
說新語謝公謂王堪乃阮千里姨兄弟雖晉之王氏
數世為外戚而元帝之后未詳是王氏其餘所稱姨
弟姨兄及姨兄弟皆不可考志謂杜府君夫人滎陽
鄭氏與潁同姓則疑是妻黨之稱然鄭夫人為試秘
書省校書郎稱之女非餘慶之女也稱之名又不見
於世系表且攷王廙之弟彬亦有傳新語注引王彬
別傳亦云與元帝姨兄弟則知姨弟之稱非謂妻黨
仍是母族之親耳杜氏通典載晉表準論云從母時

俗所謂姨母也姊妹相謂之姨子其母謂之姨母然則姨母即爾雅言母之姊妹為從母與今人之稱謂同姨母已見漢書霍光傳傳言本名涵避文宗故名改而宰相世系表涵作墮恐表之謫也上都即京兆府萬年縣唐之京師也天寶元年稱西京至德二載稱中京上元二年復稱後京後乃改稱上都云長安志言昇平坊在皇城東第二街蓋即此所云昇平里也志於操順淑朗句書刻脫去順字後乃補添於此行末操字之下

古泉山館金石文編

按杜行方墓誌銘其姨弟鄭澣撰堂弟述甫書行方官同州司兵叅軍同州為漢左馮翊唐治馮翊

縣故誌稱左馮翊司兵掾也行方先世以元和姓纂證之並合姓纂元志考功郎中杭州刺史生叅謨陝州司倉生倫水部郎中澧州刺史誌云歷憲閩郎署而後出分符竹即指倫以水部郎中出刺澧州行方以下姓纂未及撰書誌銘即出中外族昆弟之手感深友睦足以想見生平

杜行方瞿氏作行力所得拓本未携至湘無由

校其孰是

陸增祥志

楚兵叅軍劉崧墓誌

裝本高廣行字不計正書在陝西長安縣

唐故楚州兵曹叅軍劉府君墓誌銘并序

進士景炎撰

公諱崙字子嵩望美彭城家寄京邑曾祖祢德行咸
高仕位佳政屬干戈亂動告牒失遺略而不言公青
春懷橘白面凌雲出事公卿奏成品秩解褐任洵陽縣
丞才繼陸安政敷五德次任寧國縣丞上司勒留下士
遠慕雖不親臨百姓亦播顯多能三任楚州兵曹位
亞題輿道益熊軾館驛事渠戎旅獲安公累任清肅
上考成高□□有殊何壽年不永大和八年七月一
日逝懷德私第享年六十有二仁兄悲切痛失鵠原哲
弟浦陽縣尉兼列職度支不復同衾邛堪異鄉夫人趙
氏頃罷鼓瑟晝哭悴容德繼敬姜聲齊孟母嗣子歡郎

年未志學時歎少孤上維彌天未能主葬女三人長適
楊族次居內年季在襁褓非惟親戚慘愴實亦行路悲
傷子壻楊氏顛報泰山之恩逝送逝川之落室人泣血
難報罔極□立誌石因農意焉以大和八年十一月廿
六日葬于長安縣□□鄉宦交礼也忠陵谷遷變乃刻
石為銘辭曰永壽 楚楚劉君刀筆凌雲友于難繼善
政易聞兩贊大邑一椽理君身歿名揚不朽蘭芬棣萼
斷腸孀妻晝哭雅合更柴如何不祿墳起曠野殞毀華
屋天然隆崗長埋片玉長女佳壻祖奠潛然下淚即日
霽恩早年安魂紀德萬古稱傳

近人尺牘稱仁兄哲弟又俗謂婦翁為泰山觀此誌

則自唐人已不獨丈人峯之說見於宋人載記矣
石紐農禹事也上缺三字不知何以牽合及此標題
處墓誤作墓志中室又泣血當是室女之謫古誌石華

黃氏所載祖祢上一字作皇亦播顯上一字作
才有殊上三字作第應遷年未志學未作才上
維號天上維作擗踊逝送之逝作淚室人人作
又宏農宏作紐誤兼列職度次居內年顓報泰
山之恩口立誌石黃氏缺兼字內字顓字立誌
二字雅合更榮榮當是榮之俗陸增祥誌

鄭覃進石經狀

碑破缺存五石正書
行數字數皆無考

國子監

准大和七年十二月五日 勅於國子監 缺九經并孝

經論語爾雅共壹伯伍拾 缺字樣肆卷 石經圖壹

軸

右伏准 勅旨創 缺鐫刻已畢伏以

陛下敦修教義崇 缺脩刊貞石遂使究尋不 缺者秘奧

盡列于 缺儒風大闡自漢魏以後淪 缺修當

聖明 缺廣大悉脩臣 缺忝司成詳觀不朽之功實賀

無疆 缺本并圖一軸謹差專知官朝 缺守國子毛詩博

士上柱國章師道隨 缺本進謹進

缺年十月十三日銀青光祿大夫守尚書右僕射兼

門下侍郎國子祭酒同中缺事太清宮使監修國

史上柱國滎陽郡開國公食邑二千戶臣覃狀進

按此刻於石經後書石校勘諸臣題名之左壹伯
伍拾下當是捌卷二字專知官朝下當是議郎二
字同中下當是書門下平章五字石經之刻始於
大和七年十二月成於開成二年九月越四年而
竣即以其年十月奏進年上缺字當即開成二年
也

趙夫人夏侯氏墓誌

石縱橫各一尺五寸二十五行行二十
六字在湖北襄陽縣鹿門書院正善

唐山南東道節度惣管充涇原防秋馬步都虞候正議

大夫檢校太子賓客上柱國趙公 亡夫人譙郡夏侯氏墓誌銘并序

鄉貢進士唐正辭撰

夫人之先譙郡人後移貫深州樂壽縣昔武王克商封夏禹之後於杞列爵為侯伯厥後因為夏侯氏漢有滕公諱嬰佐高祖定天下子孫益熾冠冕弥盛國史家傳粲然可觀曾祖諱載滄州長史 祖諱璿試太子詹事滄景節度都押衙考諱萼試太常卿充冀州南宮鎮遏兵馬使皆宏材茂器移孝為忠夫人紹餘慶於千年傳遺芳於三代備謙柔之行稟純淑之姿舉不違仁動皆合禮既笄年之歲歸于趙氏克叶關雎之興允諧鳴鳳

之求

趙公以文武全才述職戎府公家之事不遑厝

靈

夫人內睦姻親外承賓客輔佐君子清風穆然斯

不謂之賢哲之行歟期天降鑒介以肩壽魚軒象服夫

貴妻榮為龍為光焜燿閨臺何啻年始知命奄歸下泉

積善無徵吁可痛也以開成五年六月廿六日遘疾終

於襄陽縣明義里之私第享年五十 趙公惣戎涇上

式遏西蕃 王事靡盬瓜時未至 夫人瞑目之際不

及撫床之哀奄安之辰莫展臨棺之慟人之知者孰不

為之傷嘆焉以其年十一月癸酉朔廿四日甲申龜地

叶吉葬于襄州鄧城縣支湖村之東崑禮也長子宗立

當軍節度散將次曰宗本鄉貢明經次曰宗元次曰宗

式威與慈訓且服教義宗立宗元侍從防遠宗本宗式
躬護聖事必誠必信禮無悔焉爰以 天人德行來請
銘誌琢于貞石庶千載之後徽猷不忌恭副孝思乃為
銘曰

猗歟夫人

植操無隣

孝由天性

義冠人倫

德行聿脩

徽猷日新

如何不吊

奄謝芳塵

展矣良夫

護塞從軍

窀穸有期

歸路無因

樊城之陰

漢水之濱

卜得鮮原

崛起孤墳

秋草萋萋

逝波沄沄

德存于石

磨而不磷

按趙公夫人夏侯氏墓誌銘唐正辭撰題列趙公
官職而不著其名開成五年回鶻款塞防秋正警

趙公惣戎涇上式遏西蕃即是時也舊唐書地理志深州樂壽漢樂城縣後魏改為樂壽隋屬河間郡永泰中屬深州又襄州治襄陽鄧城漢鄧縣屬南陽郡古樊城也宋故安養縣天寶元年改臨漢貞元二十一年改鄧城代宗三年改元永泰貞元二十一年為德宗末年夫人當文宗開成五年年五十則生於貞元六年時樂壽已屬深州而終於臨漢改鄧城之後碑誌與史悉合

癸酉朔則廿四是丙申甲申乃十二日廿四日甲申則朔日當值辛酉碑有誤

陸增祥志

開成五年十一月薛昫撰在鳳臺

金石續編卷第十終